

四庫全書

史部

欽定四庫全書

歷代名臣奏議卷八十六

明 楊士奇等 撰

經國

宋高宗建炎二年開封尹宗澤上疏曰易曰幾者動之微吉之先見者也君子見幾而作不俟終日孟子曰雖有鎡基不如待時蓋天下之事見幾而為之待時而措之則事無不成苟或失焉必至汗漫委靡而不振矣方

今輦轂之下民俗安靖宗廟社稷儼然如故以致收復伊洛而敵人過河捍蔽滑臺而敵騎屢敗河東河北山寨義民數遣人至臣處乞出給榜旗引領舉踵日望官兵之至皆欲戮力協心掃蕩番寇以幾言之則大宋中興之盛於是乎先見矣以時言之則中原恢復之期於是乎可必矣惟在陛下見幾乘時早還華闕與忠臣義士究圖事功則萬舉萬全可以復境土而成中興也或者以謂自揚至汴時有小寇恐屬車之來途中不能無

虞臣謂造此言者乃姦儉小人自為身謀耳殊不知盜賊所以作者誠緣法駕久寓外郡國勢未強天下不能定于一故時有竊發之事乃若六龍來復宅中圖义則比屋歡呼人各歸業強不凌弱衆不暴寡豈復有盜賊耶此事甚易明此理甚易知然而姦邪之蔽於營私往往不肯開陳而力為陛下詳說者惟老臣而已臣所以再三言之者豈好辯哉恭念祖宗二百年舊都不忍為姦臣委去也恭念陛下聰明齊聖之資不忍為姦臣蔽

蒙也念赤子之嗷嗷不忍為姦臣坐視而不救也念金人猖獗不忍為姦臣縱敵而不殺也伏願陛下念茲在茲斷自淵衷速回鑒輿上以對祖宗之神靈下以慰黎元之懷想外以平醜類之侮拂則天下大定指日可期書曰勅天之命惟時惟幾望陛下留神而三復之臣今遣僚吏呼延次升及臣之子頴詣行闕以聞

澤又上疏曰臣得范瓊書叙說所統軍兵有海內招安使臣水軍奉聖旨令於儀真駐劄教習水戰抗拒上流

於三月八日已到真州臣讀此語而不知扈蹕之臣誰
為陛下建此議也且王者無外其規模約束當使守在
四夷昔楚人城郢史猶鄙之況陛下奄有九有之時可
規規子牙為偏霸之事乎茲豈憊人之欲虛張敵勢以
為可防其意望遷延六龍進發之期爾殊不知此聲一
傳則四方驚愕必以謂中原不守遂為江寧抗拒之計
如是則何以綏安四海之聽乎蓋天子為君萬邦而元
后作民父母陛下回鑾登樓肆赦則普率之人欣欣悅

而相告曰天子宅中圖又則萬邦罔不率俾矣元后正位丕承則兆民浸浸於變時雍矣夫如是將見金人不足患而中興之功與天比宗若使范瓊教習水戰是聖心猶豫尚緩還期則中外播聞愈自懾怯則萬國何自而咸寧乎此臣所以拭目注望屬車之塵不忘夙夜伏願陛下明詔范瓊整促人馬不須更習水戰祇備扈駕歸御京闕毋使羣黎百姓齎咨涕泣則豈惟老臣之幸寔天下萬世之幸

澤又上疏曰臣竊見漢光武用寇恂為潁川太守因從車駕擊隗囂潁川盜賊羣起帝顧謂恂曰潁川迫近京師當以時定獨卿能平之恂對曰潁川惡少輕剽奚能為哉但聞陛下有事隴蜀故乘間竊發耳若乘輿南向賊必惶怖歸死臣願執銳前驅帝即日命駕南征盜賊悉降遂建東漢中興之業臣竊見近日有招安到丁進者數十萬眾願為陛下守護京城又李成願扈從還闕即渡河備禦敵軍又沒角牛楊進等領眾百萬亦願率

衆渡河迎取二聖茲三頭項人馬非潁川比也今皆披
漚肝膽同寅協恭共濟國事臣聞得道者多助多助之
至天下順之果陛下千乘萬騎來歸九重適追我太祖
太宗奕世聖人二百年大一統基業則天下必心悅而
誠服庶績其凝萬國咸寧矣尚何盜賊憑陵之足慮乎
臣敢瀝悃誠再冒天聽伏望裁赦

澤又疏曰臣聞孟子曰雖有鎡基不如待時故君子不
先時而起不後時而縮當其可而已易曰幾者動之微

吉之先見者也故君子見幾而作不俟終日不曰如之何而已恭惟我國家曩緣敵人侵犯郊畿殘破州縣恣為誕妄百端邀求今天意悔禍人心助順考時與幾寔陛下中興之會也古聖人勅天之命惟時惟幾者蓋以時哉不可失而知幾若神故也臣觀京師城壁已增固矣樓櫓已脩飾矣龍濠已開濬矣器械已足備矣寨柵已羅列矣戰陳已閱習矣人氣已勇銳矣汴河蔡河五丈河皆已通流泛應綱運陝西京東滑臺京洛番賊皆

已掩殺潰遁矣天下萬邦與畿甸生靈夙夕祈天而請
者鄉南懇禱而願者但望陛下千乘萬騎號令風伯雨
師清塵灑道翠華回輦歸御九重為四海九州作主耳
且一人有慶兆民賴之茲其時也茲其幾也臣願陛下
毋聽姦邪之言而忽其時忘其幾天下幸甚果急兩河
山寨之心與沮萬民敵愾之氣則天下危矣願陛下毋
循東晉既覆之轍臣老矣不勝至誠惻怛懇切之至願
陛下哀憐之

澤又上疏曰臣聞孟子言術不可不慎也矢人惟恐不傷人函人惟恐傷人巫匠亦然臣因斯語始知人心所存之邪正與所作之是非若以迹槩之了然區分如辨黑白夫忠義之人動容周旋無非忠義而不忠不義之事無自入焉故其於上下愛戴保護不啻如函人惟恐其傷之也彼不忠不義之人動容周旋亦無非不忠不義而忠義之道無自入焉故其於上下毀裂擯棄不啻如矢人惟恐其不傷之也恭惟我國家曩緣敵人肆橫

殘破州縣圍閉京城劫掠邀求靡有紀極以至強迎二聖后妃親王與諸天眷蒙塵北去凡忠義之士莫不痛心疾首泣血奮厲佐佑陛下張皇六師震耀神武總領貔貅之士掃蕩沙漠迎奉二聖來歸京師俾中原生靈還定安集固或流散愛戴其上保護其下夙夜念念想如函人焉唯恐其或傷之也其不忠不義者但知持祿保寵動為身謀謂我祖宗二百年大一統基業不足惜謂我京城宗廟朝廷府藏不足戀謂二聖后妃親王天

眷不足救謂諸帝諸后山陵園寢不足護謂周室中興
不足紹謂晉室覆轍不足羞謂巡狩之名為可效謂偏
地之伯為可述儲金幣以為敵資椿器械以為敵用禁
守禦之招募慮勇敢之赴敵也掊保甲以助軍慮流離
之安業也欺罔天聽凌蔑下民凡誤國之事無不為之
猶矢人焉唯恐其或不傷之也臣願陛下驗已試之迹
以道槩之則人心所存之邪正與所作之是非自然區
分無足疑矣臣衰老孱懦誤蒙陛下識擢俾留守京城

兼開封尹事臣砥礪瀝竭知無不為惟恐失措有誤國
家大計然臣每所申奏若非陛下察臣斷斷孤忠憐臣
悄悄見愠體天地之大德覆護擴日月之大明照臨臣
與血屬當膏砧斧釐粉萬狀矣尚安能為陛下保釐尹
正使京城市井里巷安居樂業熙熙皞皞如我祖宗太
平之時乎臣之至此豈止謗書盈篋而已耶臣願陛下
六龍萬乘早歸大內下慰四海生靈瀝血懇切之望臣
之言此寔出悃誠痛切憤悶所以不避姦邪詆誣不避

冒犯誅戮臣願陛下降臣此言榜之朝堂俾應在朝臣僚寔封章疏指摘臣言如臣言稍涉狂妄乞正典刑明臣罪惡如臣言果符忠義乞降詔勅明告回鑒之期庶安天下之聽此事甚大恭俟睿慈洞察勿貳勿疑

澤又上疏曰臣犬馬之年已七十矣陛下不以臣衰老無用付之東京留鑰臣自去年七月到任夙夜究心營繕樓櫓城壁掃除宮禁闕廷分布柵寨訓練士卒教習車陣比及終冬諸事稍稍就緒都城貼然風物如舊人

人延頸跂踵日夜俟望聖駕還闕臣以故自今年正月三日兩次遣屬吏及臣之子捧表遠詣行在投進祈請車駕西上歸肆大赦於宣德門使天下曉然皆知陛下言旋舊都再造王室命令用是通達盜賊用是消弭無復有方命阻兵之患然後容臣為陛下條畫措置造膝陳請遣一使泛海道入高麗諭以元豐惇好之舊令出兵攻金人之西又復遣官從間道趨河東諭折氏脩其舊職以固吾圉使三陟交攻金人令彼應敵不暇吾方

大舉六月之師一道由滑濬一道出懷衛涉河並進北
首燕路訪大遼子孫興滅繼絕約為與國則燕冀之感
恩荷德不患不為吾用如此則金人勢必孤弱自可縛
而臣之二聖天眷自此決有歸期兩河故地自此決可
收復而況兩河之人感祖宗二百年涵養之澤雖陷敵
踰年而戴宋之心初無携貳使吾大兵渡河而戰則東
北人民必有背敵歸我前徒倒戈攻于後以北誰不願
為吾死孟子曰雖有智慧不如乘勢雖有鎡基不如待

時今時則易然也臣嘗以今日時勢觀之天意悔禍人心固結雖三尺童子爭欲奮臂鼓勇復祖宗之境土迴二帝之鑾輿況當六月宣王北伐之時機會間不容髮陛下何憚而不亟還京師使臣獲奉咫尺之威請借筋以籌黃帝書曰日中必昃操刀必割此言時不可失也諺曰當斷不斷反受其亂此言斷不可誣也今日之事臣願陛下以時果斷而行之毋惑讒邪之言毋沮忠鯁之論倘陛下以臣言為是願大駕即日還都使臣為

陛下得盡愚計若陛下以臣言為非願陛下即日放罷
老臣或重竄責臣所不辭惟明主可與忠臣言臣故昧
死以聞

澤又上疏曰臣聞詩於小雅載六月宣王北伐之事蓋
遐裔以弓矢馬騎為先而當六月歆蒸之時皆難於致
用故宣王乘時行師終於薄伐玁狁以建中興之功臣
自留守京師夙夜匪懈經畫軍旅近據諸路探報敵勢
窮促可以進兵臣欲乘此暑月遣王彥等自滑州渡河

取懷衛濬相等處遣王再興等自鄭州直護西京陵寢
遣馬橫等自大名取洺趙真定楊進王善丁進李貴等
諸頭項各以所領兵分路並進既過河則山寨忠義之
民相應者不啻百萬契丹漢兒亦必同心備禦金人事
纔有緒臣乞朝廷遣使聲言立契丹天祚之後講尋舊
好且興滅繼絕是王政所先以歸天下心也況使敵人
駭聞自相攜貳耶仍乞遣知幾辯博之士西使夏東使
高麗喻以禍福兩國素蒙我宋厚恩必出助兵同加掃

蕩若然則二聖有回鑒之期兩河可以安貼陛下中興之功遠過周宣之世矣臣犬馬之齒今年七十矣勉竭疲駑區區愚忠所見如此臣願陛下早降回鑒之詔以繫天下之心臣當躬冒矢石為諸將先若陛下聽從臣言容臣措畫則臣謂我宋中興之業必可立致若陛下不以臣言為可用則願賜骸骨放歸田里謳歌擊壤以盡殘年頻煩上瀆天聽悚恐待罪

三年司諫趙元鎮上奏曰臣恭惟陛下歷茲艱運屢更

變故雖否泰循環理之必至天其或者眷佑我宋激勵
陛下益堅憂勤之念以就中興之業乎昔趙簡子以襄
子為後謂其臣董安于曰是其人能為社稷忍辱後襄
子蒙受灌飲之耻而卒滅智伯越王句踐敗困會稽既
以反國置膽于坐飲食必嘗曰汝忘會稽之耻耶後亦
以滅吳區區小國之君苟用心如此卒能有成今陛下
承隆平久逸之後躬履艱棘淮甸之擾倉卒播遷二兇
姦謀乘間竊發陛下不深以罪人而責躬克己唯以天

下為念是能為社稷忍辱矣其亦飲食嘗膽如負會稽之耻仰承天之所以責成之意則興衰撥亂此其始歟唯夫食不加肉衣不重綵折節下賢與百姓同勞苦是乃句踐之所以滅吳也

元鎮又奏曰臣嘗謂方今之事所以易敗而難成者其害有二臺諫不盡言朝廷不任責不盡言則昧于利害之寔不任責則忽於成敗之機其欲保邦致治不亦難哉臺諫之不盡言也以朝廷惡聞其事拒之而不得言

言之而不得行則與不言何異畏棄地之譏中變連和之策懼避戎之論力沮渡江之謀遂使遺患都城流毒淮甸生民淪陷社稷阽危是皆不任責以致之禍可既哉今陛下深鑒其失矣然今日之事與前不侔議和之使係踵於道而兵禍不解初幸浙西再臨江左而防托未脩則朝廷之責益重矣惟陛下與大臣圖之母蹈前車之失至於祖宗基業付託之重孰為之子孫四海生靈歸附之心孰為之父母此則陛下之責也當斯時負

此責顧不艱哉唯自任不疑力行不屈赫然丕變庶幾
有濟其或畏避苟且幸其無事則淪胥以敗未見有振
起之漸昔劉備起漢踈屬志在靖難雖困敗沮辱之中
而剛果之氣略不少衰一時豪傑皆為其用卒能以區
區疲蜀屢困中原之師後世稱之號為英主今陛下兩
經大變艱難顛沛亦已極矣而天下之責猶不得辭之
臣願陛下持志宜益堅臨機宜益壯奮發天威之斷激
昂神武之姿至大至剛終始如一凡今日未獲之事躬

自任之以風勵天下使公卿任公卿之責將士任將士之責則內脩政事外靖邊圉舉在是矣實宗社之幸斯民之幸也

元鎮又上奏曰臣於今月初一日嘗具愚懇仰瀆聖聰乞候浙西平定及建康已有渡江的耗乃議進發竊聞昨日已降指揮初十日巡幸平江外議紛然頗謂未便臣不知朝廷有無探報所報如何浙西之寇即今何之平江境內曾無侵犯建康之衆曾未渡江若平江之吉

凶未知建康之去留未審則今來車駕將安往耶聞欲
暫駐越州徐圖所向因為就食之謀然越州百里之內
悉遭虜掠不過取之衢婺諸州而陸路阻脩艱于運漕
儻未接濟何以支吾倉皇之中益難措手兼敵人未遠
狡詐難防萬一分兵出奇姑為回戈之勢則行在咫尺
寧無震驚人心一搖變故莫測臣雖淺陋慮猶及此也
或謂軍儲窘迫不能安居彼此不殊何由足備臣愚欲
乞先遣王玘等軍分屯嚴婺不惟減省行在用度亦足

張大聲勢應援浙西以俟建康寧息及平江保守無虞
然後移蹕北還似未晚也恭惟陛下以萬乘之尊負宗
廟社稷之託凡茲舉動要當萬全前日頒降德音固已
失之太遽如今日回蹕之事尚願少留聖慮豈可堅執
前議不虞後患臣採之衆論如此非臣管見敢此異同
伏幸留神省察

元鎮又上奏曰臣嘗謂天下有公論不可以力制不可
以智勝由堯舜周孔以迄于今如權衡之設黑白之辨

自一人之善惡至朝廷之賞罰一付於此則天下治矣
國家陵遲衰弱之漸人皆謂兵革之為患其亦知有以
致之乎以善惡是非之倒置公論久鬱而不明也其來
遠矣禍胎至深固宜痛心疾首亟變而力新之如救災
溺唯恐不及如去惡草絕其本根使風教純一物情和
會則人之所欲天必從之悔禍於我其或在是搢紳者
間猶昧此或狃於術業之異或牽於恩舊之私陰有所
懷巧為沮遏忘乎大公至正之道而甘心于亡國喪家

之術亦其人之不幸歟非特其人之不幸也宗廟社稷
天下生民之不幸也靖康之初發蔡京之罪錄黨籍之
家而議者則曰今邊事未息軍政未脩忽而不省乃復
為此不急之務建炎之初辨宣仁之謗復詞賦之科而
議者又曰今二聖未還兩河未復置而不問乃復舉此
迂闊之議其言一行姦計潛發遂使上皇引咎哀痛之
詔半為空文淵聖紹復祖宗之言訖無成效噫太平之
治須太平而為之抑亦為之而後至耶苟惑於其說如

前所云則天下之事無時而可為雖善惡是非久鬱于公論者亦不得而措詞矣必欲厭服人望得其歡心不亦難哉唐憲宗用皇甫鏐程异為相裴度論之曰可惜者淮西盪定河朔底寧承宗斂手削地韓弘興疾討賊豈朝廷之力能制其命哉但以處置得宜能服其心耳德宗當奉天之難詔問陸贄一時急務何者切直贄對以理亂之本繫於人心況當變故搖動之時在危疑向背之際人之所歸則植人之所去則傾安可不審察羣

情同其欲惡使億兆歸趨以靖邦家此誠當今之急務也以裴度陸贄之才非不知高城深池堅甲利兵與夫折衝制勝為禦侮防患之策而納忠于君者其言如此誠知弭亂之本歟陛下詔膺大統適茲多艱欲大有為必知其要念憲宗中興之業在處置之得宜察陸贄理亂之言繫人心之向背凡祖宗之法復而未盡崇觀之患染而未除以至進退賞罰苟當於人心而合乎公論雖流離顛沛而因革可否不可一日而廢唯公論著善惡

明興議攸歸士風丕變則慕德向化心悅而誠服之矣
寧謂已往之事無益于今耶若夫積粟練兵之計攻守
奇正之謀當責之有司而朝廷之上朝夕之所講明者
正宜在此唯陛下不以踈闊而忽之

起居郎胡寅進萬言書劄子曰臣竊考古者人君巡守
本以省方觀民黜陟諸侯而考制度故舜以五載為節
周以十二歲為節盖有常制不然則詰戒戎兵征討不
庭如高宗伐鬼方成王伐淮夷宣王伐玁狁無非事者

先王之舉動惟此二端固不為苟也秦漢以來如始皇
孝武乃好用兵外夷間以豫遊馳騁八荒國家病矣亦
未有為狄人追逐逃避奔潰而無所定止者也至唐明
皇為安祿山所叛首以萬乘之君弃宗廟社稷而出奔
如古失國諸侯寓公為笑萬世至其後嗣習為故常代
宗德宗皆一再出狩不以為耻然猶所據得形勢之利
又有謀臣猛將為之宣力扞患難雖能克復不至滅亡
而其挫志忍辱亦不少矣豈古所謂巡守之意哉本朝

受命太祖太宗躬擐甲冑以定大業無有寧歲卒平四方奠宅中土則與古戒兵戎討不庭伐鬼方淮夷獫狁之事可無愧矣至真宗親駕澶州戡定北邊功尤俊偉自是以後坐致太平思欲告功神明昭示得意遂祠汾陰封太山則與古省方觀民黜陟諸侯而考制度之意雖未盡善亦庶幾焉夫此二端豈不費國勞民而國以益安民無怨咨者以其所舉凡欲為民非苦之也聖聖相繼至上皇凡五朝非以郊祀籍田未嘗警蹕城外軍

民之情四方觀聽皆以為固當如此歷百餘年生長老死惟京師為安爾靖康之失既往難悔陛下嗣位則正商高宗周宣王所遇之時而遽循唐明皇代德奔走之跡遂不力圖興復抗志有為公卿大臣反以省方巡幸之美名而文飾之自南都至維揚自維揚至錢塘自錢塘至建康自建康至平江三年之間國益危勢益蹙敵益橫人益恐回視過日但有不如此平江素無江山險固之強惟以陂澤沮洳數百里自保譬猶蹄涔坎井豈

足以盤礴神龍一失波濤雖螻蟻猶能困之若又遠駕
縱能緩于追侵而衆怨必生宐有肘腋之變不待著龜
所告理之必然者也故播越隱遁天下之人皆可惟陛
下則不可臣自扈從以來日夜憂懼欲奮然陳論慕斷
鞅之所為竊恐宸心積久多畏在朝議論決不僉諧虛
洩聽聞無補于事欲泯默度日又念備數近侍存亡休
戚分義所同反覆思之不能自己輒以愚鄙之見條成
一書綱舉七策別為二十事論巡幸之失畫撥亂之計

冒昧塵獻其間切要輒用黃紙貼出以備省覽至於因議大體而泛及他事者難以槩舉則亦用紙表見之非敢自謂無不中者然今日大謀恐須如此乃能振起伏望陛下懇惻憂思特賜詳閱如可施行即乞降付三省密院叅酌去取斷為國論即日改圖如或不然則臣所見亡竒止於如是雖備任用何能有補願從廢黜實所甘心至於狂戇之言觸犯顏色私自揣度理難寬貸陛下寶慈天覆必能恕之震慄雖深恃以無恐所有臣書

謹具進呈其書曰臣伏覩詔書以敵人侵陵備禦不給
遂有移蹕之意右顧岳鄂左趨吳越安危利害下詢羣
臣臣時駭然不意清問之及此何者陛下自錢塘來幸
江寧也有詔曰以援中原矣及至江寧以舊邸之名符
啓建之義改為建康府以昭受命之祥也有詔曰興邦
正議于宏規矣繼而深懲維揚之禍遣奉隆祐太后以
六宮及百司不與軍旅者之南昌也有詔曰朕與二三
大臣帷幄宿將堅守不動誓有一死以荅羣生矣前後

三詔近在半年之中而今來詔音不同如此退伏思念
至于旬時陛下以安危利害訪於在廷苟或慮之不精
計之不審以害為利以危為安偷顧目前妄有建白則
其負誣聖明迷誤社稷罪在不赦輒陳愚見不避斧鉞
泛論建炎謀國之失而陳撥亂反正之計念時事之迫
切仰德意之寬大冀功效之可立忘觸冒之難恕惟陛
下留神省察臣聞孔子曰成事不說遂事不諫既往不
咎今臣所陳不免追咎既往者蓋謂建炎已來有舉措

大失人心之事今欲復收人心而圖存則既往之失不可不追不可不改故也一昨陛下以親王介弟受淵聖皇帝之命出帥河北二帝既遷則當糾合義師北向迎請而遽膺翊戴亟居尊位遙上徽號建立太子不復歸覲宮闕展省陵寢斬戮直臣以杜言路南巡淮海偷安歲月敵兵深入陝右遠破京西而漫不治軍略無扞禦盜賊橫潰莫之誰何無辜元元百萬塗地怨氣上格目昏無光飛蝗蔽天動以旬月方且製造文物糜費不貲

猥于城中講行郊報朝廷動色相謂中興敵騎乘虛直
擣行在匹馬南渡狼狽不堪淮甸之間又復流血逮及
反正寶位移蹕建康不為久圖百度頽弛淮南宣撫卒
不遣行自畫大江輕失形勢一向畏縮惟務遠巡軍民
怨咨如出一口存亡之決近在目前凡此節次十餘條
皆所謂舉措失人心之大者也自古衰亡固不足道請
以中興者言之夏少康周宣王燕昭王越勾踐漢光武
莫不任賢使能脩政事治軍旅而其奮發刻厲期於必

成者則又本於憤耻恨怒之意不能報怨終不苟已所以光復舊物各稱賢君未有乘衰微缺絕之後竊竊焉因陋以為榮施施焉苟且以為安而能久長無裊者也為陛下計當如何而黃潜善汪伯彥顏岐顧以乳嫗護赤子之術待陛下曰上皇之子殆將三十人今所存惟聖體不可不自重愛也曾不知太祖勤勞取天下列聖兢業嗣守不敢墜失今也宗廟為草莽堙之陵闕為畚鍤驚之堂堂中華戎馬生之赫赫帝圖盜賊營之然則

潜善伯彥所以誤陛下陷陵廟蹙土宇喪生靈者又豈
燕昭越踐漢光武之比乎本初嗣服既不為迎二帝之
策因循遠狩又不為守中國之謀以至于今德義不孚
而號令不行刑罰不威而爵賞不勸巡幸所至民以淮
甸為戒駐蹕所在人以敵至為憂東南之州郡幾何翠
華之省方無已若不更轍以救垂亡則陛下永負孝弟
之愆常有父兄之責人心已去天命難恃雖欲羈栖山
海跋履崎嶇臣恐非所以為自全之計也為今之策願

陛下一切反前失而已則必下詔曰繼紹大統出於臣
庶之諂而不悟其非巡守東南出於僥倖之心而不虞
其禍經涉變故僅免危亡蓋上天警戒於眇躬俾大宋
不失于舊物金人以遐遠之裔擾亂中華日尋干戈扶
立僭偽以強陵弱俾臣作君朕義不戴天志思雪耻父
兄旅泊陵廟荒殘罪乃在予無所逃責以此號召四海
聳動人心不敢愛身決意講武然後選將訓兵戎衣臨
陣按行淮甸上及荆襄收其豪英誓以戰伐天下忠義

之士必雲合而景從天下武勇之夫必響應而颶起國
用不足於此不患無財甲馬不強於此不患無備有道
多助孰不順之秦隴雖遙驍騎壯士即可坐致齊魯雖
失饒財厚貨必自竭輸陛下凡所欲為孰不如志其為
利害豈與退保吳越日就滅亡同年而語哉臣不自量
每切憤歎既未能被堅執銳先啓戎行而服業簡編討
論古昔固當忘其昧陋少贊經綸輒為陛下畫中興之
策莫大於罷和議蓋和之所以可講者兩地用兵勢力

相敵利害相當故也非強弱盛衰不相侔所能成也而其議則出於耿南仲何也淵聖皇帝在東宮當宣和季年王黼欲搖動者屢矣南仲為東宮官計無所出則歸依右丞李邦彥邦彥其時方被寵眷又陰為他日之計每因王黼讒譖頗曾解紛亦緣上皇仁慈本無移易太子之意也既而淵聖嗣極遽遷前朝大臣而邦彥為次相金人遽至城下邦彥諧譖小人烏知遠慮遂獻和議而南仲以宮傳之重方奉椒房出奔聞六飛堅守至陳

留而返自愧其失因附邦彥而沮种師道擊敵之謀於是覆邦之患滋蔓而起分朋植黨必欲自勝主戰伐者李綱种師道兩人而已幾會一去國論紛然中制河東之師必使陷沒以伸和議之必信二帝遠去宗族盡徙中原塗炭至今益甚者本緣南仲主持邦彥以報私恩不為國慮之所致其朋徒附合狠忮膠結寧誤趙氏不負耿門之所為也使其可和則淵聖執德不堅馴致禍敗而陛下卑辭厚禮避地稱臣無所不用其極乞和之

使接武於道宜其少緩師矣何乃累年而尚無效耶自古中國盛強如漢武帝唐太宗其得志四方必并吞掃滅以示廣大侮亡取亂極其兵力而後已中國禮義所自出也恃強陵弱猶且如此今乃以廉退慈仁君子長者之事望於反常悖道之叛臣與剽悍之敵有是理哉若以爲強弱之勢絕不相侔縱使向前萬不能抗則自古徒步奮臂無尺寸之地而爭帝王之圖者彼何人哉伏望陛下明照利害之原罷絕和議刻意講武以使命

之幣為養兵之費此乃晉惠公征繕立圉之策漢高迎太公呂后之謀斷而行之堅確不變庶幾敵人知我有含怒必鬪之志沙漠之駕或有還期不然則今僻處東南萬事不競納賂則孰富于京室納質則孰重於二帝飾子女則孰多于中原之佳麗遣大臣則孰加于異意之宰輔深思遠慮反復計之所謂乞和必無可成之理昔北兵至澶州王欽若陳堯佐請幸吳蜀惟寇準勸親征及成功之後欽若等羞恨無以藉口則撼真宗曰當

是時寇準亦豈有好計但是熱血相沃譬如博錢以陛下為孤注耳使人君不明則欽若之言為愛君而寇準之功為幸勝今之議和者其情狀一一出於此苟能息絕其議陛下不藉之以塞民望大臣不藉之以寬已責則必為善後之圖矣夫事有緩急治有先後既定議講武則其餘庶常有日力不暇給者當置行臺以區處之今典章文物一切掃地百司庶府殆為虛設其必不可闕者惟吏部戶部為急誠使江淮兩浙湖北並依八路

法慎擇監司而付之則吏部銓事亦復減省不過置侍郎一員郎官兩員胥吏三十人則所謂磨勘封叙奏薦常程之事可按而舉矣戶部所以治天下財賦也今四方供貢久不入于王府往往為州郡以軍興便宜截用經常一壞未易復理竊觀行在支費每月無慮八十萬惟以權貨鹽利為無窮之源耳故臣謂宜置行臺或建康或南昌或江陵審擇一處以安太后六宮百司以耆哲諳練大臣總臺謹守成法從事郎吏而下不輕移易

量留兵將為營衛命戶部計費調度以給之其虛名無
寔徒費國用之所一切省罷陛下奉廟社之主提兵按
行廣治軍旅周旋彼此不為定居惟是侍從臣僚帥臣
監司要害守牧則當加意以時進退其賢不肖功罪之
著明者而餽餉之權自宜專責宰相而選委發運以佐
行于下如漢委蕭何以關中唐委劉晏以東南經制得
人加以歲月量入為出何患無財所謂宰相之任代天
理物扶顛持危其責甚重非特早朝晚見坐政事堂弊

弊然於文具無益之末移那闕次以處親舊濟其私欲而已也古之人君臨政願治必委任宰相豈徒體貌崇重一聽其所為亦必深相提策務為明白計日累月以考功緒陛下視今日國勢孰愈於前日乎此在宸心所自鑒照臣未敢深論也夫大亂之後風俗靡然躬率而不變之者則在陛下務寔效去虛文夫治兵必精命將必賢政事必脩誓戡大憝不為退計者乃孝弟之寔也遣使乞和廣捐金幣不耻卑辱冀幸萬一者為孝弟之

虛文也屈已致誠以來天下之士博訪策略信而用之以期成功者乃求賢之實也未見賢若不克見既見則不能由之或因苟賤求進之人遂乃例輕天下之士姑為禮貌外示美名者為求賢之虛文也聽受忠鯁不憚拂逆非止面從必將心改苟利於國即日行之者乃納諫之寔也和顏稱善泛受其說合意則喜之不合則置之官爵所加人不以勸或內惡其切直而用他事遷徙其人者為納諫之虛文也將帥之材智必能謀勇必能

戰仁必能守忠必不欺得是人而任之然後待以恩御以威結以誠信有功必賞有罪必刑者乃任將之寔也庸奴下材本無智勇見敵輒潰無異於賊與之親厚等威不立賜予過度官職逾涯將以收其心適足致其慢聽其妄誕張大之語望其朴實用命之功者為任將之虛文也簡汰其疲老病弱升擇其壯健驍勇分屯在所置營房以安其家室聚粟帛以足其衣食選衆所畏信者以董其部伍申明階級之制以變其驕恣悍悖之習

大抵如周顯德年中世宗命我太祖之意然後被之以精甲付之以利器進戰獲首虜則厚賞死則恤其妻孥退潰則誅其身降敵則戮其族令在必行分毫不貸者乃治軍之實也無所別擇一切安養姑息之惟恐一夫變色不悅幸無事則曰大幸矣教習擊刺有如聚戲金鼓之節旗幟隊伍皆習敵人之所為紀律蕩然雖其將帥不敢自保者為治軍之虛文也慎選部刺史二千石必求明惠忠智之人使久於其官懲革弊政痛刈姦賊

以除民害雖軍旅騷動盜賊未平必使寬卹之政寔被於民固結百姓將離之心勿致潰叛乃愛民之實也詔音出於上虐吏沮於下誑以出力自保則調發其丁夫誘以搞設贍軍則厚裒其錢穀弓材弩料竹箭皮革凡干涉軍須之具日日征求物物取辦因緣姦弊民已不堪乃復蠲其稅租載之赦令寔不能免苟以欺之者為愛民之虛文也若夫保宗廟保陵寢保土地保人民以此六寔者行乎其間則為天子之實也陵廟荒圯土宇

日盛衣冠黔首為肉為血以此六虛者行乎其間陛下
戴黃屋建幄殿質明輦出房帷尾金爐夾侍兩陞仗馬
衛兵儼分儀式贊者引百官以次入奉起居既退宰相
大臣卑卑而前搢笏出奏司辰唱辰正則駕入而仗出
矣以此度日而國勢益卑彼敵人者晝夜厲兵跨河越
岱電掃中土遂有吞吸江湖蹂躪衡霍之意吾方挾持
虛器茫茫然未知所之此則為天子之虛文也伏望陛
下留意寔效勿愛虛文於此七者奮發慷慨而力圖之

今宿衛單弱國威銷挫臣嘗言乞早勾發京師衛士赴行在又降等仗於兩浙福建江東西湖南北四川二廣抽揀禁軍貢發充御營正兵增厚其月廩精加訓閱陛下自將之天子之軍既強則中國之變自弭昔漢高祖嘗大敗于成臯矣與數騎渡河入張耳韓信軍奪其印易置諸將軍遂復振此特御將之大權雖知如韓信且莫能測宜其取秦滅項甚易陛下今欲於劉韓張岳四人之兵有所移易廢置臣知其不能矣權既偏重柄既

倒持彼必謂陛下不能一日而舍之夷踞桀驚日以滋起陛下以孤立之身寄於其上安能使此四人者常無怨怒相激而不為變乎苗劉之亂率爾而作者坐此故也漢獻帝時主柄下移不能自立李傕郭汜以偏裨小將互劫乘輿至以臭牛之骨與帝進饌萬乘人主為叛臣所質此既往之鑑也臣謂今日見在兵必不可用既未有以大更易之莫若先集天下勁兵以強御營之勢然後可以彈壓悍將驕兵悍將驕兵既不敢妄動就紀

律則四方橫潰之軍及羣起不逞之盜必自帖息猶有披猖不軌者遣偏師以銳卒往禽滅之遂罷招安策況陛下以雪耻復讎為已任仗大義而行天下頑兇不義之徒固將斂衽倒戈而聽驅使之命矣漢光武為銅馬帝者用此道也東南之禁卒既起則又命福建團結槍仗手建汀南劍邵武四郡精選萬人各擇其土豪使部督之各屯本處以俟興發命兩浙募水手并選發諸州撩湖捍海等兵盡付水軍教習戰艦命江東西湖南北

募弓手以在官閒田給養之人得一頃正稅之外其餘
科須一切與免命廣西及辰沅鼎靖於見數峒丁中寔
科有技能壯勇者不取虛數分畝踐更屯戍襄漢為山
林谿谷之援以京西淮南荒廢無主之地為屯田招集
兩河山東及本路流徙之人畧依古法均節之擇強武
者訓習使且耕且戰文武臣中有明習營屯之事肯承
任者因以任之凡此六條雖非講武必為之急亦不可
不為之助陛下試使執政大臣委弃簿書細故勿設他

說以相論疑日夜圖回擇人而為之必見績狀於是時而兵不强敵不畏盜不息然後可以歸之天命無所復為矣不然是自弃也陛下內有自弃之心而欲于目前三四庸將數萬潰卒中求為久安三尺童子亦知其不能矣或者必曰軍旅之興民最受弊今若如前所陳恐未能有損於强敵而先已自殘其民矣則臣應之曰自敵入寇已來國家歲歲以和好自處未嘗敢以兵刃北向凡以愛民恐勞之也然大河以南連亙數十州之地

城覆民屠不可勝計豈用兵之罪耶設有一城一邑能率勵兵民誓以死戰一郡不克一郡繼之不猶愈於束手屈膝斃於白梃之下哉惟在任將相使處置合宜則雖使民以死尚且不怨況欲用兵以保衛赤子乎漢光武既滅新莽之後東征西戰尚十餘年而後天下大定當時豈無勞民費財之事所計者大則有所不暇恤顧能于軍旅擾攘之中常有愛惜生靈之意故天助而人歸之苟坐視四海流血而避用兵之勞費則是舜不當

征苗啓不當討扈高宗不當伐鬼方宣王不當伐玁狁
以噎廢食非通時務經國之遠猷也自古圖王霸之業
者必定根本之地而固守之而非建都之謂也陛下家
世都汴舍汴都焉今欲用關中而制山東則力未能至
按南渡六朝之遺迹則舍建康不可雖然欲謀進取則
非堅坐不動之所能必觀進取形勢之便用之而圖成
臣竊謂惟荆襄為勝春秋之世楚嘗以是抗衡上國窺
周問鼎三國割據曹操聞孫權以荊州假劉備則失箸

而駭六朝建立雖南北之形已判亦必增重上流庾亮
欲經略中原則先分戍漢沔宋太祖欲伐魏則先廣襄
陽資力故晉何充謂荆楚國之西門地帶趙蜀得人則
中原可定失人則社稷可憂今湖北接京西雖無大險
然方城為城漢水為池管仲之所不敢輕蓋地近中州
上下不過千里其要害易守非如淮泗汗漫平原按行
四通五達易入而難備也曹操用兵彷彿孫吳而赤壁
敗亡幾於不救則難易之勢可見矣誠能屯唐鄧襄漢

之田以養新兵出廣西武陵峒丁并施黔獠軍築堅壘
列守漢上阻以水軍經以正軍緯以弓手民軍牽制江
黃呼吸廬壽則進取之基立然後陝西聲氣血脉通達
而騎卒可至川廣之富皆猶外府易以拱挹其比於漂
泊大江之南棲伏東海之濱險易利害相去遠矣建康
固是六朝舊都甘守偏隅遷延國祚亦何不可臣獨以
為不可焉蓋為陛下之責與晉元帝不同故也西晉為
劉聰吞併無復能立懷愍兩君皆以弑殞故元帝自琅

邪王又憑王敦專制淮南十年之威起而纘祚然傳世
十帝享國百年強臣內叛勍敵外迫其得僅存猶綴旒
耳當時非無謀臣猛將提重兵出入終不能復取中原
者非獨天運亦勢使然也今陛下之父兄在敵中固無
恙然居穹廬毳帳之中其衣服飲食居處動靜豈得比
中國民庶中人之奉哉其聞陛下嗣登寶位也必日夕
南望曰吾有子弟為中國帝王吾之歸庶有日乎痛惟
愁荒屈辱之中發此念為此言于今三年日迫日切而

獻謀者方欲導陛下南狩日遠日忘遂無復國之心別
求建都之所此臣所深不喻也今河北河東之民知朝
廷不復顧思已甘心左社山東京西淮甸之民猶冀陛
下未忍遽棄若更遲延歲月無以及之則怨恨陛下而
為敵國者所至皆然亦何必金人邪於此而欲建都非
特不可亦必不能矣故臣願陛下先命呂頤浩杜充分
部諸將過江廣斥候治盜賊自以精兵二三萬為輿衛
於穩密州郡速置營屋以安存其所謂老小者陛下提

此兵渡江而北緩轡而上遣使巡問父老撫綏挺刃之
餘民至於荆襄規模措置為根本之地猶漢高之於關
中光武之於河內雖巡歷往來征伐四出而所固守必
爭而勿失者以荆襄為重陛下富于春秋非如昔人
白首舉事覬萬一之成者誠能堅忍聳厲坐薪嘗膽悠
久為之而不能濟則書傳所載周宣王漢光武之事皆
為妄言以欺後世無足信矣陛下聰明洞照必不謂然
也上世帝王為治之道惇睦宗族強本弱枝所以鞏固

基局紹延佑命故三代有天下皆傳數十世而周又特為長久蓋以大建宗室以自藩屏故也原其用心蓋以天下為公而不以為私初非如後世以智力把持之褊心多忌雖有骨肉懿親眈眈不借以尺寸之權而恐其伺便軋已亡秦是已漢以為鑒遂大封同姓非劉氏不王及其久也光武劉備皆以宗室倡義而起於滅絕之後夫漢高固欲為久遠無窮之慮非為其一身也以謂不如是不足以大庇子孫萬世血食然則封建宗室

者乃固守天下之要術也今陛下之族北去者衆矣所幸免亦幾何而黃潛善鄭穀小人之見本無遠識謂陛下以支子入繼又不緣傳付之命國步未夷恐肺腑之間不無非望之冀考其行事必曾進言恫疑虛喝以恐動宸心故自南都以至維揚誅竄之刑疑忌之意相尋繼見雖其罪戾或自貽戚然亦恐未必盡出於治親齊家之美意審如是欲以保國而延歷難矣今宜同姓中不間親疎選擇賢材布之内外廣加任使其望實傑然

出衆者陛下宜留之宿衛夾輔王室其有克敵戡難之功者宜漸為茅土之制星羅而棊列以慰祖宗在天之靈以續國家如綫之緒使敵人知趙氏之居中國者尚如此其衆既失而得復者非獨陛下一人而已則其撲炎火之橫心立異姓之逆謀庶其少息乎夫創業垂統之君必立綱紀以遺子孫繼世承序之君必守綱紀以法祖宗綱紀存則存綱紀亡則亡所繫如此夫一君子進衆小人未必退一小人進則衆君子必退矣勢不兩

立而於君子為難蓋其道固如此仁宗皇帝在位最久
得君子最多小人亦時見用然罪著則斥之君子亦或
見廢然忠顯則收之故其成當世之功貽後人之輔者
皆君子也至王安石則不然斥絕君子一去而不還崇
信小人一任而不改故其敗當時之政為後世之害者
皆小人也仁宗皇帝所養之君子既久且遠日以消亡
矣安石所教之小人方新而近其蕃息未艾也所以誤
國破家至毒至烈不知已時然則陛下欲求君子而用

之而不愛爵祿以待其人豈非甚不易得者乎君子未
得而已試無堪敗事顯著之小人稍稍類聚其未至則
召之惟恐其不來其既至則用之惟恐其不速混然雜
進其黨必集所謂悔過用賢之意與陛下反正之初絕
不侔矣陛下土地金帛能有幾何豈堪此輩大言輕捨
盡輸之敵人耶將以汲引豪傑延致英雄而標的如此
是猶却行而求前北轅而適越爾夫以賢治不肖此治
平以前陛下之家法以不肖治賢此熙寧已後陛下之

家戒矧當今日否塞之氣充牣於中原陰長之滋勃興
於敵國非得希世異材上下內外迭任交用泰何由復
而否何由傾乎此綱紀國家之一事也右文左武者有
國不易之道漢高祖用韓信彭越不以加於蕭曹光武
用賈復耿弇不以加於鄧禹唐太宗用李靖李勣不以
加于房杜蜀先主用關羽張飛不以加於諸葛孔明非
獨其禮文等降不同其誠心所以待遇之亦異今儒學
衰息未有巨賢碩德屹乎朝廷以收運籌指蹤之功陞

下所深恃以為心膂爪牙者惟三四庸將耳夫此數人者以近時論之曾不足以當种師道之廝役況望古昔名將乎而偃蹇龐然當負重寄使平寇盜尚或未能豈敢冀其向敵人發一矢也自愧無以塞責則大言詭論以上欺睿聽慢辭倨禮以下視朝士謂今日禍亂皆文臣所致耳敵人方強不可與爭鋒必以退避自保乘時而動又不鈴勒其衆動則潰潰則盜盜則招招則官反復循環無有窮已其為國家之害豈文臣所敢望哉竊

聞陛下推心撫之失于太厚出入內禁不以時節小人不知義理習於所熟以謂君臣上下猶朋輩然恃憑威靈無有紀極寵而不驕驕而能降降而不憾憾而能矜者鮮矣臣願陛下委大臣以腹心待近臣以禮貌常使南衙朝士氣勢重於此徒天下抱才自愛之人必願立於左右緩急之際必有能為陛下竭忠盡節不愧古人者矣與樊噲為伍韓信猶羞之況儒士乎臣叅奉內朝班綴之後欲求近臣如汲黯之流氣折淮南尚未多得

羸軀弊輿惴惴然於長戟犬馬之中卒伍賤人皆得以惡聲誰何之不敢正色忤視少拂其勢從臣如此況其下者乎唐制監察御史秩七品衣綠至卑也然銜命出使則節度使具橐鞬郊迎本朝沿此意郎官出使則序位在轉運使之上凡此蓋欲尊重天朝習民于上下之分也故事宰相坐待漏院三衙管軍於簾外倒仗聲喏而過呂夷簡為相日有管軍忽遇於殿廊年老皇遽不及降階而揖非有悖戾之罪也夷簡上表求去以為輕

及朝廷其人以此廢斥蓋分守之嚴如此今見其分庭抗禮矣推此類非一日長不已陛下不為之別異表著是自削堂陛無復等威亦將何所不至哉此綱紀國家之二事也治天下者必取篤實躬行之士而舍浮華輕薄之人所以美教化善風俗本朝自熙寧以前皆守此道至王安石以佛老之似亂周孔之實絕滅史學倡說虛無以同天下之習其習既同于今五十年士以空言相高而不適于實用以行事為粗迹曰不足道也其或

蹈規矩守廉隅稍異於衆則羣嘲而族笑之以為異類
紛紛肆行以至敗國二帝屈辱羿莽擅朝以謂是適然
耳伏節死難者不過一二人此浮華輕薄之為害也夫
欲變風移俗惟係上所好惡韓琦富弼在朝文武兩班
升朝官以上即不許自陳磨勘皆聽檢舉所以養勸廉
耻恢張四維故當時人知自重風俗忠厚至今乃有身
為從臣而自陳磨勘乞覃恩轉官不以為耻者矣推而
上之見利必忘義貪得必患失遺其親後其君背叛篡

奪便可馴致此明君之所甚畏而深戒者也今萬化之原本於陛下苟力行孝弟則天下忠順者來矣好賢遠佞則天下名節者出矣賞清白則貪汙者屏矣崇行義則奔競者息矣旌能實則謬誕者懲矣貴忠厚則殘刻者遠矣為反此道則頽波日漫必至於糜爛而後已至於文辭之麗言語之工倒置是非移易黑白誠不宜任用以為浮薄之勸也靖康二年著作郎顏博文佞諛張邦昌則曰非湯武之干戈同堯舜之禪讓及為邦昌作

請罪表則曰仲尼從佛肸之召本為興周紀信乘漢王之車固將誑楚博文近世所謂能文之士也其操術反覆如此故廉耻道消四維大壞則社稷隨之陛下何利焉此綱紀國家之三事也法度者所以治天下之具號令者所以行法度之幾而信義者所以出號令之實也孔子曰自古皆有死民無信不立聖人重信至於易死疑若太過鄙夫陋儒以智詐譎詭為術者必忽此言然真宗澶州與契丹結盟契丹守之百有二十年不敢先

動宣和宰相王黼一旦敗盟舉兵結遠夷伐與國取景德誓書還之天章閣天地鬼神所臨重誓自我背之遂使敵人得以藉口夫金人何憾於我哉皆契丹碁之假手借兵報滅國之怨耳失信之禍乃至於此孔子之言良不為過而近日以來朝廷失信於民尤甚臣不能徧舉其目但如所謂前降指揮更不施行如所謂已差下人別與差遣此等奏語必日聞於冕旒之側矣陛下何惜不勅大臣俾審熟思慮而直為此反汗之失以欺駭

四方之聽乎今外州郡專制不稟朝命者漸多有之所恃以指麾役使惟在號令出之不審則輕守之不固則疑輕而且疑則制命之權不在陛下矣承受既數奉行實難不曰略與應破指麾則謂不晚必又更改近在朝廷尚有此風遠而四方從可知矣陛下縱有真賢實能付之民社仁政惠澤播之黔黎以是之故何繇責其功效百姓雖愚然習於知見必謂朝廷之令率皆誑我是心一萌姦雄得以誘之矣此綱紀國家之四事也郡守

縣令者親民之官監司者統臨州縣之長天下之治起於一縣縣治則州治州無不治則天下治矣明主必慎擇居此之人既得其人必久任之以考功罪之實而施賞罰焉近日以來朝廷移易郡守監司無月無之殆不可勝紀東南路分不過十數何為紛紛如此陛下宜察其故矣謂其不才而罷之耶則曷若考慎於未命之前也顧恐未必然特出於用事者之私意耳民力已困財用已竭潰兵劇賊方洋乎其間戎務軍須交制乎其上的

朝廷憂勞嘆息而未能救尚忍不為擇忠信之長慈惠之師以撫綏之乎臣願深詔大臣自今以往於郡守監司縣令斷以三年為任非有大過勿輕移改縣令不許輒從奏辟去官其有貪汙為民害者舉祖宗法痛懲治之仍許內外侍從官舉所知堪為令者歲一人後不如舉貶秩示誠留意此事庶幾斯民於鼎沸之中有蘇息之望又今吏部無闕以待入官之人士無所得祿一切苟且求權攝以度日見居官者不能勝任逆避患害則

求差檄幹辦之名苟營俸粟無復宿業之志欲事治而民安難矣今欲乞專委諸路帥臣轉運提刑不以遠近共限一季申發部內見任及闕官已授未到職位姓名叅三司之實付吏部為案抵以行差注諸有以便宜從事辟置官屬者必用曾任令錄以上無過犯人其奏補出官及曾以不職無治狀罷者不聽奏舉奏補人必依舊法試銓無銓則於逐路運司歲一試之仍增時議策問各一首精其選少其數中格則出官以絕請求賄賂

冗食之弊肅清仕路政在得人此綱紀國家之五事也
臣稟賦凡下無大過人然夙夜思之又考之往古揆之
公論所得如此於當世之務雖未能盡亦可見其大槩
矣惟陛下動心加慮反覆而求之隆寬降意開納而聽
之萬一可行則至誠惻怛奮乾之健而速圖之日月逝
矣歲不我與以為今日難于前日安知後日不又難於
今日乎往日雖不可復追不當謂無可為者而遂已也
天定勝人大福不再深可憂懼今年之春震雷大雪白

虹貫日中有黑子錢塘之變實先垂象恭以上天之仁
眷顧陛下懇懇至厚所以申命用休者不啻再矣陛下
出於屯難側身怨艾親近書史引對多士減徹玩好躬
親庶政亦非復維揚之比臣民共知不可誣也然任至
重者力必強責至大者憂必深天下萬姓以二帝之故
所望於陛下者非止如是而已迺閏月金犯大火芒怒
赫然九月朔旦日有食之車駕復有思患預防之行明
堂遂虛陽德大弱錢塘受辱之地豈可再杜六飛縣名

柏人漢祖不宿若趨會稽幸三衢則地形窮僻扈衛益勞貢賦不通財用益窘道路艱阻朝覲益稀郵置迂深命令益隔人知陛下無復興之志威權日削無可瞻望投戈四逸孰能止之惟有臣區區之言理明事順思迎父兄誓報讐恥奮志強厲有進無退庶足以感發軍情率先將佐於危絕之中求生存存之道此非怯懦畏避之所能濟也不然而姑恃天命之不庸釋是猶不耕于田枵腹以待嘉穀之旅生不續于麻露肌以待野蠶之成

繭事理之必無者矣又惟斯民戴宋無二者徒以祖宗
德澤深厚人未忍忘雖甚塗炭猶未瓦解雖甚怨怒猶
未反叛然以比來巡行所過觀之傍道里縣之民一切
空盡以避兵卒其甚者田疇荒萊室廬破毀生聚不保
滿目蕭條殊非來蘇望幸之美傳示四方何以彰德頃
在建康已獲金人之覘者以此知敵人雖負十全之勢
而限以長江不敢輕渡然屯駐山東聞有數路並入之
謀陛下不深委將相早為防遏但欲深尋幽遠則回顧

州郡復為虛邑必曰君王尚且畏避何以責我守城民心覩此安能久忍而無變亂若不望風稽拜以事敵人必將推賢擇能以自保治陳勝吳廣因民不忍而劉項乘之秦遂滅亡者蓋本於此古人稱中興之治者曰撥亂世反之正秦不正而甚亂漢高祖反之正而興焉王莽不正而甚亂光武反之正而興焉隋不正而甚亂唐太宗反之正而興焉唐末五代不正而甚亂我太祖皇帝反之正而興焉反之正者反易其道究其敗亡之由

盡更而去之猶反覆手之易也今之亂亦云甚矣其反正而興之在陛下其遂陵遲不振亦在陛下金人雖強其衰弱可待特恐中國豪傑因之而起反吾之亂興彼之治則陛下之大事去矣天下記之野史書之善惡榮辱垂之方來後人觀之亦猶今之視昔夫湯以七十里而有天下楚以七千里而為讐人役今金人之強未如秦其得罪於中國無人不怨則有甚於始皇之於六國也東南形勢控帶江山兼有吳楚之地坤維嶺海提封

自如非如湯以七十里而起也而乞憐偷生之勢乃甚
於楚之為秦役此臣所以日夜憤懣為陛下痛惜而傷
大臣之過計也昔宗澤留守京師一老從官耳猶能致
誠鼓動羣賊北連懷衛之民誓與同迎二帝皆相聽許
尅期密應者無慮數十萬人不幸為黃潛善所惡百万
沮抑憤悒而死其志不就羣臣亦無敢以澤所謀達于
宸聽者以此知人心未厭二帝之德何況陛下身為子
弟責孰加焉誠欲北向而有為臣將見鋤耨慘於長鋸

奮臂威於甲兵舉四海惟陛下之用決不為失策惟在
陛下斷與不斷為與不為耳五路事宜張浚已行措置
今能使淮南荆襄肘臂相應山東合從則敵人所守者
數千里之地兵分勢離批亢擣虛攻其不備多方以誤
之不厭不退以十年為期陛下必能掃除妖氛一清天
步脩上京之廟貌拜鞏雒之神臯遠迓父兄歸安鳳闕
再新儀物永固皇圖陛下於時憂責方已巍然南面稱
宋中興永永萬年欣懷無斃其與惕息遁藏蹈尾負耻

有如今日豈不天地相絕哉臣本疎外之蹤無所知名
誤蒙眷求擢侍左右顧眎之溫寵遇之榮多士流傳以
為口實重惟職司記注掌書言動喪亂已來典籍廢缺
官業不舉素餐是愧況覩寇讐未殄盜賊憑陵鑿輅傍
徨民無死所臣於此日得近清光有知不言有言不盡
苟非畏禍即是欺君震懼于衷不能自己慙愚抵冒理
合誅夷寬仁如天恃以無恐儻或其言可采有補大猷
尺寸之功垂名竹帛是古人之所榮微臣之至願也干

潰威嚴臣無任墮越俟罪之至

時議遣使入雲中寅為中書舍人上疏曰臣竊聞遣使
臣入雲中已有定議臣愚陋蒙陛下擢寘從班職在獻
納雖小事失當猶合上聞況遣使體大縱使初不預議
苟心有所未安豈敢緘默輒形論奏伏望陛下留神省
察昔孔子作春秋以示萬世人君南面之術無不脩載
而其大要則在父子君臣之義而已魯桓公為齊所殺
魯之臣子於齊有不共戴天之讐而莊公者乃桓公之

子也非特不能為父雪耻又與齊通好元年為齊主王姬四年及齊狩于禚五年會齊同伐衛八年及齊同圍成九年及齊盟于莒是年為齊納子糾仲尼惡之脩書於策以著其釋怨通和之罪魯莊惟忘父子君臣之義也魯之臣子則而象之故公子牙弑械成于前慶父無君動於後卜齋圉人犖之刃交發於黨氏武闡之間魯之宗祀不絕如綫此釋怨通和之效也豈非為後世之永鑒乎女真者驚動陵寢戕毀宗廟劫質二帝塗炭祖

宗之民乃陛下之讐也頃者誤國之臣自知其才術不
足以戡定禍亂而又貪慕富貴是故譸張為幻遣使求
和以苟歲月九年于此其效如何彼之一身叨竊爵位
而去曾何足道而於陛下聖德國家大計則虧喪多矣
所幸陛下勇智日躋灼然獨見於邪言久惑之後奉將
天討罪狀豫賊再安國步漸圖恢復天下忠臣義士聞
風興起各思自効以佐丕烈譬如人行萬里登車出門
又如支吾夏屋初正基柱存亡治亂實係此時今乃無

故蹈庸臣之轍踐阡國之址犯孔子之戒循魯莊之事
忘復讐之義陳自辱之亂臣竊為陛下不取也或謂不
若是少有貶屈其如二帝何臣應之曰自建炎丁未以
至甲寅所為卑辭厚禮以問安迎請為名而遣使者不
知幾人矣知二帝所在者誰歟見二帝之面者誰歟聞
二帝之言者誰歟得女真之要領者誰歟因講和而能
息敵兵者誰歟臣但見丙午而後通和之使歸未息肩
而黃河長淮大江相次失險矣臣但聞去年冬使者還

言遠人帖服國勢奠安形于奏章傳播遠近曾未數月而劉豫之衆稱兵犯順矣女真者知中國所重在二帝知中國所恨在劫質知中國所畏在用兵則常示欲和之端增吾所重平吾所恨匿吾所畏而中國坐受此餌既久而後悟也天下其謂自是改圖必矣何為復出此謬計耶苟曰姑為是爾則豈有脩書稱臣厚費金幣而成就一姑為之事也苟曰以二帝之故不得不然則前效可考矣況歲月益久敵情益閔必無可通之理也臣

嘗思之陛下與女真絕則臣下無所得而人主為義舉若通和則利歸臣下而人主受其惡故凡願奉使通和者皆身謀非國計也陛下何不據孔子之論而決此策乎自王安石廢黜春秋天下學士不知尊尚一旦亂臣賊子接迹乎四海幸遇陛下篤信此書孔子之志將伸於今日便當考筆削之意斷當今之事只行一二者陛下美名輝映千古矣當今之事莫大於敵國之怨也欲舒此怨必雪此讐言則用此之人而不用講和之臣行

此之政而不脩講和之事使士大夫三軍百姓皆知女
真為不共戴天之讐人人有致死於女真之志百無一
還之心然後二聖之怨有可平之日陛下為人子之職
舉臣等鴛下伸眉吐氣食息世間亦預榮矣苟為不然
以中國萬乘之君而稱臣於金人則宰相而下皆其陪
臣也借使女真欣然講解以一將軍將數萬衆駐兵泗
水之上願與陞下面相結約軟盟而退不知陛下何以
待之則又欲變置吾之大臣分部吾之兵將割我之地

土而取其租稅有一於此其能從之乎從之則無以立國不從則隳敗和好將何據而可臣實戇昧思之不通是以略具古義浼瀆聰聽惟陛下誠加采擇或合聖意即以世讐當復無可通之義明降指揮寢罷奉使之命刻印銷印俄頃之間初無害日月之明適足以彰陛下好謀能聽之美免累聖德誤國大計臣不勝區區納忠之至

寅又奏曰臣竊聞宰相張浚有論使事為兵家機權與

臣所論事理不同今何辭遂行不可救止臣待罪侍從
初有所陳已荷聖知今浚以輔國謀臣陛下之所改顏
而禮貌之者也勢難以臣故以沮其議臣不當力論取
勝徒成紛紛然臣再三思慮終未曉浚之說須至剖析
聞於聰聽望陛下留神省覽姑且志之聖懷俟他日驗
臣所計與浚孰中孰否則使事之利害決矣今則未敢
求直也金人總師二十餘年破大遼弱我宋雖無遠略亦
精於用兵其所行事盡詭詐也今我之虛寔彼豈不知

尚須卑辭執謙然後足以驕其心示弱屈服然後足以平其怒乎此遣使之無益一也庚戌後不遣使敵兵亦不來及癸丑遣使則鈎引敵使入國熟視而去曾不旋踵而淮南之警奏至矣此遣使之無益二也前我所遣四輩皆朝廷之選侍從之臣聞其入敵境晝夜驅遞略無禮節及見彼主坐受欺紿怱怱而歸未嘗得其要領也而況何薛一使臣其何能任覘國之事乎此遣使之無益三也昔富弼之使也以一言息南北百萬之兵可

謂偉矣使歸行賞遷進官職弼方以中國未能用兵徒
賴使人口舌下敵為莫大之耻終不肯受其識度如此
乃可辦國今奉使者首先論其私事祈求恩澤一二足
意而後行所慮卑近與市井之人無異尚能明目張膽
不辱君命乎此遣使之無益四也萬一金人臨以兵威
肆其恐脅使人必不能就死則反以我之情告之是自
敗也死生之際唯烈士不懼曾謂何蘚而能之乎此遣
使之無益五也金人之所大欲者誰不知之既有滅宋

之心正使劉豫明日就亡今日亦必赴救而況豫賊祈
哀乞援秋高草熟來寇何疑此不待窺覘自可坐照於
一堂之上也此遣使之無益六也今淮以北劉豫自以
為其封疆矣河之北金人自以為其土宇矣使者之行
豈能乘雲馭風徑至敵境哉必渡清河之阻經濁河之
限然後能至也去冬下詔罪狀劉豫明其為賊今豫肯
賓吾使人達之於金哉臣恐戎伐凡伯則有之矣此遣
使之無益七也今我與金之勢如兩家有沒世之怨一

弱一強強者侵陵不休弱者必固其門墉嚴其戒備待
時而動庶能有濟乃欲命一僕夫陷以酒肉悅以金帛
適足以重吾之弱增彼之強而已此遣使之無益八也
自古兵強馬衆玩武不戢而無自焚之變者此五胡英
傑勒曜垂珪之所難也敵人好財貪色兇殘不義特盜
賊之靡耳非有保國永世兼并天下之術也度其勁兵
壯者老老者死其犬馬之齒日已長矣其謀臣志滿意
得沈酣乎子女玉帛之間不越數年必有禍敗此易見

也萬一今冬黨助豫賊昧於一來陛下申嚴將士據大江之險以禦之彼再而衰三而竭必矣小小勝負兵家之常今未有兵交之形而遽自納侮以示畏恐情見力屈當反為所乘非兵家形格勢禁之法此遣使之無益九也夫和人心之迎合金人之意為身謀而已陛下寤寐賢才日昃不倦菲衣節食卑宮室陋器用以養戰士固將為父兄攄覆載不同之憤雪滄溟不滌之耻也若堅用和策則謀臣解體義士喪氣將帥偷安而卒伍泮

散以為無復有輸忠効智建立功名之日使和人自謂其說可用如此必有進為之漸以國與人取說金人大事去矣此遣使之無益十也獨有一說使陛下難處者以二帝為言耳然自建炎改元以來使命屢遣無一人能知兩宮起居之狀謦欬之音者況今歲月益久敵必重悶惟懼我知之今以敵為父兄之讐絕不復通則名正而事順他日或有異聞在我理直易為處置若通而不絕則敵握重柄歸曲於我名寔俱喪非陛下之利也

使或有知二帝所在一見慈顏宣達陛下孝思之念雖
歲一遣使竭天下之力以將之亦何不可之有其如艱
梗悠邈必無可達之理乎以此揆之則以二帝為言者
理不難處也臣聞善為國者必有一定不可易之計正
其大義不僥倖以為之漢高祖出關得董公之謀以弑
君討項羽後雖屢敗然項羽負不義之罪雖強必弱漢
守其策不變終有天下然張良燒關之舉養虎之喻君
子猶羞道之及劉先主諸葛武侯志在復漢目操為賊

亦能三分鼎立魏延出奇欲速孔明不求近功君子以
為真以天下自任者古之英雄規模注措大抵如此三
國崛起曹氏先據利勢蜀最後立豈以微弱之故卑下
於操以苟存耶孟子曰君如彼何哉強為善而已今日
大計只合明復讐之義用賢才脩政事息民訓兵以俟
北向更無他策倘或未可惟是堅守若夫二三其德無
一定之論必恐不能為至於何辭之行非特無效決
須取辱臣所見如此豈得以張浚有言而自抑也又況

蒙被詔書曲加獎諭先以為榮今焉內愧所以致詳盡
義忘其喋喋心在報君非好辯也若夫軍旅之事則未
之學張浚以遣使為機權者臣所不諭不敢強為之說
伏乞陛下幸赦之取進止



歷代名臣奏議卷八十六